



“In bancje nol ere un canocjâl!” gjo, a mê mari, par finî la storie di chê altre volte.

“E cui no erial, alore?” disè jê.

“Nol ere nancje un cjan, tu âs cjapade Rome par Tome” gjo.

“Cjan, par talian cano!” disè jê, tacant alore infalibile a contâ chê di sô none di Piso.

La none e à vût tai voi in vite il slavin di soldâts pal païs e tes cjasis in timp de Guere Grande dal cuindis disevot. Soldâts talians, sul imprin, fin dal disesiet. Todescs e di ogni gjenie puartade dai todescs, dopo la disfate di Cjaurêt, e ancjemò talians cu la vitorie, tant che la none e à vût tai voi soldâts e il flagjel de guere, fin che dal trenteun e je muarte.

E un soldât e à crodût di viodi sul puarton, puare femine, une dì che al veve metût pît un forest cuntune biele barete cul frontin, jentrât par baratâ cjastinis.

A dilunc dal curtîl di Piso al jere tirât adalt un filistrin, de parte di cjase fin sul puarton, dulà che e podeve cori tun anel la cjadene dal cjan blanc di Piso, paron di talpinâ alore sù e jù, di un soreli al altri.

“Graduato” e conte Dusuline di vê sintude la none businâi di sù la parte di cjase a chel des cjastinis sul puarton, “jentra pel puartelo che pel puartono senò va fuori il cano.”

De none, mê mari e conte saldo ancje chê de pipinute di zes, la volte che e jere restade di bessole, chiste none, e tratant che Dusuline di siet vot agns e les a durmî cun jê, i veve prometût di regalâi une pipinute, tant che, pe gole de pipine, Dusuline e je lade ancje un dôs gnots, traversant dilunc sù il païs, ma di pôre dal scûr e ancje de none che la gnot e ronçave, dopo no je lade plui, pazienze pe pipine, che intant la none e veve za comprade, in fiducia, e cussì je à dade distès, no savint ce fâ di une pipine a chês etâts, ma subit daûr la pipinute di zes e je colade e distacât il cjâf, si viôt che la frute no le veve propi vuadagnade.

di Ivano Urli

#932